

Q. B. V.

DISSERTATIONEM INAVGVRALEM
DE

LAVDE
FEBRIS
MERITO SVSPECTA

PRAESIDE

IO. GOTHOFREDO DE BERGER
CONSILIARIO AVLAE ET ARCHIATRO REGIO
PROF. MED. PRIM. ET ACAD. SENIORE
PRO LICENTIA

IMPETRANDI SVMMOS IN ARTE SALVTARI
HONORES

P. P.

IOANN. ADAMVS HACKER

ARTZBERGA BAYRVTHINVS

A. D. XXIIIX. APRIL. cIo Idcc XXX.

IN AVDITORIO MAIORI

HORIS ANTE ET POST MERIDIEM CONSVETIS.

VITEMBERGAE

EX OFFICINA GERDESIANA.

DE
LAVDE
FEBRIS
MERITO SVSPECTA

DISSERTATIO SOLENNIS

I.

Si quondam Romani, talem febris naturam esse, credidissent, qualem postea multi praedicarunt, ei quidem procul dubio, qua erant superstitione, nullius formidine mali, neue noceret, sed spe potius boni, tanquam bonae deae, in fano, quod ipsi,

ut Cicero, *III de nat. deor.* et Plinius, *hif. nat. lib. II, cap. VII*, habent, in palatio dicatum erat, publice sacrificassent. Ita enim, ut alios taceam, *Th. Roder. a Veiga*, philosophus, et Medicus Eborensis, *Comm. de differ. febr. lib. I*, febrim, existimat, utilem esse intemperaturam, ortam a corde, uel auctam potius cordis et arteriarum operationem, in usus, uel totius corporis, aut uariarum partium, pro uaria rerum necessitate excitatam a motu naturae, cor regentis, atque ex innata doctrina, cum uniuerso caloris exercitu aggredientis, quicquid in corpore noxii sentiat, et uel coquere, uel pellere nitentis. Qui, cum in eo potissimum laboret, ut causam febris effectricem illam, cor regentem, naturam statuatur, ex insita doctrina humorem noxium adorientem, et, febrem homini propriam, ac in se bonam utilemque esse, ostendat, nec, nisi ex accidenti, in male materiatis et ruinosis corporibus occasionem quandoque mortis fieri, haud secus, ac uer, ex se saluberrimum, cum, tepore suo relaxans corpora nostra, atque ad uiuidiores motus excitans, collectos iam prauos humores, et semina morbosa, commoueat : ab eiusdem naturae innata ac insita doctrina, qua ea, malum sentiens, ad occurrendum

dum magnis corporis damnis, diffusione calidi ex corde, id, quod alienum est in corpore, et aduersum, certis temporibus aggredi, et separare, excernereque norit, etiam accessionum febrilium, et periodorum, atque certorum electionem dierum, in quibus, reparata ex ante acto labore, natura, crisin et uictoriam speret, deducere conatur.

II.

Nondum orbi cognitus erat circuitus sanguinis, cum ita febrem *Veiga* reuerendam esse, profiteretur, cui alioqui facile fuisset conuenire cum iis, qui hodie, febrim a uulgo quidem hominum morbum haberi, nihil autem aliud esse, arbitrantur, quam spontaneam naturae energiam, et actum, animae humanae proprium, eumque bonum et utilem, quo ea, conseruationi corporis sui intenta, aucta cordis et arteriarum operatione, siue pulsu celeri, motum et circuitum sanguinis, hoc quidem consilio et sapienti instituto, augeat et intendat, ut eodem adauctis pariter secretionibus atque excretionibus, materia morbida, membra corporis ad putredinem destructionemque dispositura,

quod alias corrigi et subigi nequeat, organico-mechanica aptitudine pororum, et directione tonica loca uersus affecta, atque excretoria, ordine, tempore, locoque, congruis, mature expellatur e corpore, idque adeo, materia eiusmodi liberatum, in pristinum uigoris ac ualitudinis statum uindicetur. Atque hi quidem illam salutarem animae intentionem, et methodum expellendi materiam noxiam, tuendique corpus ab interitu, tam certam habent, ut, in ea omne recte curandi rationis momentum situm esse, opinentur, et, quam *Veiga* causam accessionum, et periodorum febrilium, crisiisque, ab innata naturae, cor regentis, doctrina, deduxit, eam illi ab aestimatiua, quam uocant, animae energia repetendam censeant, ex quibus unum eius sententiae ducem ac principem, celeberrimum *Stablium*, laudasse sat erit.

III.

Haec mihi cogitanti in mentem uenit recordari ueteris illius, ac uerae opinionis, iam usque ab Hippocratis ductae temporibus, eiusque medicorum, tam Latinorum, quam Graecorum, et Arabum, aliarumque gentium, firmatae con-

consensu, febrem interdum sibi, aliquando etiam aliis morbis, præsidio esse. Namque fieri nonnunquam uideas, ut febris, comminutione eiectioneque materiae, a qua excitabatur, et ipsa conquiescat, et, quod *Celsus, lib. II, cap. II X*, ex Hippocrate annotauit, praecordiorum dolores, si sine inflammatione sint, finiat, et in iecinoris dolore succurrat, et neruorum tam resolutionem, quam distentionem rigoremque, tollat, et aliorum medicina morborum euadat. Haud aliter ac morbis etiam pluribus aliis usu uenire solet, ut aliquando ex accidenti, nonnunquam per se, non modo nihil detrimenti, sed plurimum potius utilitatis et commodi, afferant, et, consumpta expulsaque materia nocente, et ipsi cessent, et morbos alios, ac saepe grauiore, uel arceant, uel deleant, eaque re alii aliis sint auxilio. Quemadmodum, exemplo coryzae, uomitionum, fluxionum alui, haemorrhoidum, et aliarum haemorrhagiarum, arthritidis item, icteri, ulcerum, atque affectuum cutaneorum, aliorumue, quotidianus rerum usus docet, ac, inter multos, *Sennertus, de febrib. et peculiari dissertatione de Salubritate quorund. morbor.* copiose docteque *Schradernus* ostendit.

IV.

Verum hæc in confesso sunt apud omnes, et cum grano salis accipienda, neque ad illam febris laudem accedunt, qua ea de morborum censu eximitur, et homini propria, actusque, animae humanae proprius, utilis et bonus, uocatur, a natura, cor regente, uel, ut cl. *Stablius* dicit, anima humana, conseruandi corporis gratia, et hac salutarī intentione, susceptus, ut, aucta cordis et arteriarum operatione, siue accelerato pulsu, auctoque adeo circuitu sanguinis, et hunc consequentium ope auctiorum secretionum, excretionumque, amoueat e corpore, quicquid aduersam ei, et funestam aliquam corruptionis atque putredinis labem minetur.

V.

Nihil, fateor, speciosius ad laudem et commendationem febris, uel dici, uel fingi etiam potest, ad cuius quidem tantae rei, qua uitae et ualetudini consulitur, disquisitionem interest, praemitti ea, quae de natura febris patent iam in promptaque sunt omnibus, quo deinde in ceteris, quae plus uideri possunt habere difficultatis, ac eam inprimis laudem attingunt, omīssa
auto-

autoritatum cogitatione, et seposito omni hypotheseum amore, ipsa re et ratione exquirere ueritatem possimus.

VI.

Ac primo quidem illud ipsi nos sensus docent, et satis iam euidens ac perspicuum est, recte febrem pulsum dici frequentem et uelocem, cum mutatione caloris naturalis, actiones laedentem, quia febris et haec pulsus frequentia et celeritas, nexu tam arcto cohaerent, ut neutra, altera separata, uel esse, uel concipi queat. Neque dubitare licet, eandem pulsus mutationem statim principio, et in accessione, frigoreque febrium etiam intermittentium adesse; id quod, cum res sit experientiae, et suo cuiusuis sensu comprehendatur, miror, non aduertisse experientissimum *Stablium*, cum *diff. de tertiana, febris genium uniuersum monstrante, cap. IV*, pulsum in accessione, et sub frigore, tardum et rarum esse, scripsit. Melius, experientia conuictus, *Veiga* statuit, cum, in frigore, uel in bona, ut l. c. ait, parte frigoris, ex celeritate pulsus contractoris, febrim adesse, aduersus

Fernelium pronunciauit. Sed dubitationem omnem expedit, illustris diuino circuitus sanguinis inuento, *Harueius*, quando *Exercit. anat. de motu cord. et sanguin. circul. cap. XVI*, in febris tertianæ principio, ubi causa morbifica, cor petens, circa hoc et pulmones immoratur, dissectione illorum, qui in principio accessionis obierunt, se comperisse, scribit, sanguinem pulmonibus impingi, et crassescere, nec transire posse, eoque principium uitale aggrauari, et anhelosos, suspiriosos, languidosque aegrotantes fieri, et tunc semper pulsus frequentes, paruos, et quandoque inordinatos esse, ab adaucto uero calore, attenuata materia, et apertis uiis, transituque facto, ac ingrauescente paroxysmo febrili, corpus uniuersum incallescere, et pulsus maiores ac uehementiores reddi. Hunc insignem uirum postea sequuti multi, et docti, et, id quod potius est, artis usu eruditi, inprimisque in Academia Lugduno-Bataua, clarissimi Medici, *VValaeus*, *Sylvius* et *Boerhauius*, idem eadem de re ita censent, ut, quia in febre omni, eaque sola, et omnibus eius temporibus, a principio ad finem usque, eum, quem dixi, crebrum uelocemque

que pulsus, perpetua et constanti obseruatione, notarunt, eodem merito commune et proprium, adeoque pathognomonicum atque demonstratiuum, omnium febrium signum contineri, statuunt. Quam quidem ueterem fuisse et publicam apud Romanos opinionem, ex ipso, inter alios *Marco Tullio* doceri posse uidetur, quando in libro, quem *de fato* composuit, cum de necessitate praeceptorum astrologicorum aduersus Chrysippum Stoicum pronunciaffet, exempli loco medicorum illud de febre, ex uenarum (uenas antiqui pro arteriis dicunt,) motu cognoscenda, proponit. Haud aliter intelligendum esse *Celsum l. c. lib. III, cap. VI*, iudicabimus, si ea, quae de calore, aliisque subdit, cum celeritate pulsus coniungamus.

VII.

Cum itaque in eo iam omnes, qui perspectam rem habent, conueniant, in illa motus cordis et arteriarum mutatione, siue pulsus frequentia et uelocitate, ipsam febris essentiam et naturam consistere, id quidem porro liquet, omnia, quaecunque motum cordis incitare, et frequentem reddere possint, inter causas febrium effectrices referenda, quorum omnino mul-

ta esse uariaque solent. Ad cuius rei intelligentiam non alienum erit in memoriam reuocare illam, quam nos observationes anatomicae docent, admirabilem machinae cordis mobilitatem, qua cor, animantis alicuius uiui euulsum, non solum, quod iam pridem etiam *Cicero, de nat. deor.* aduertit, mobiliter celerrimeque palpitat, uerum etiam a motu cessans, et quiescens, leni stimulo fotuque, ueluti reuiuiscit, et pulsus suos repetit, quin et in multas diuisum partes, motum ita continuat, ut et resectus mucro, et in eodem, singulisque reliquis disseci cordis partibus, singulae omnium fibrae, quamuis utroque extremo careant, suapte ui alternis uicibus se contrahendo, diducendoque, tanquam uiuentes adhuc spirae, aliquandiu agitari cernantur. Vt uero haec in corde, ita euulso, fieri solent; sic illud de corde, in resectis itidem animantibus uiuis adhuc integro, et continuatis ei uasis, notatu dignum est, toties moueri uenam cauiam, toto illo tractu ab hepate in iugulum, adeoque sanguinem ad cor propellere, quoties animaduertitur arteria aorta pulsare, et ideo sanguinem ex corde recipere, ac ligata et constricta filo eadem uena, ita ut sanguini aditus in auriculam dextram praecludatur,

mox

mox motum utriusque auriculae, cordisque, cessare, soluto autem uinculo, admissoque ex uena caua in auriculam sanguine, mox reddi eundem et restitui; atque extincto deinde motu cordis motum auricularum, praesertim dextrae, satis interdum diu superstitem esse, eaque emortua, uenam cauam iuxta cor adhuc micare, et, hac etiam conquiescente uena, omnique emortua compage cordis, ab immisso, per ductum thoracicum, uel uenam cauam, huiusque ramos, spiritu, auriculam primo dextram, hinc ipsum uentriculum dextrum, mox et auriculam sinistram, subinde etiam uentriculum sinistrum, non in defunctis tantum animantibus, sed ipso etiam cadauere humano, aliquoties palpitare. Neque praeterire harum rerum curiosum poterit, quod itidem frequenti experimento animaduersum est, ligatis, aut resectis neruis cardiacis, mox motum cordis ualde turbari, et, cum summo animalis languore, imminui, tandemque, imo repente interdum, extinguui.

IIX.

His ipsam solertem tam facile mobilium auricularum cordis et uentriculorum constructionem, nexumque, et cum cerebro, toto-

que corpore, per ductus succorum plenos arteriarum, uenarumque et neruorum, coniunctionem et communitatem, si addamus, uim illam mechanicam cognoscemus, qua Deus isthaec omnia tam apta inter se et connexa, perpetuitatis cordis et circuitus sanguinis, ipsiusque adeo uitae, causa, ita machinatus est, ut, quando cor semel contrahi, et sanguinem in arterias propulsare coepit, idem deinde, istius suae uifabricae, et coniunctionis cum dictis ductibus, atque contentis iisdem, et pressis commotis, que succis, alternis suarum auricularum et uentriculorum motibus, alterni ope influxus ex cerebello per neruos, atque ex aorta per arterias coronarias, in substantiam cordis, in cauamque ipsius per uenas, cauam et pulmonariam, sanguinem in circuitum agere, eoque omnia agitare in corpore, atque a se ipso moueri, nequaquam uero nutu nostro regi debeat, neque finem motus, qui illo ordine, quo motus motum ciet, nititur, habere possit, quamdiu iste solidi et liquidi concentus consensusque persistat. Namque fieri sic aliter nequit, quin eodem tempore, quo sanguis, systole cordis, in arterias eiicitur, flumen eius in orbem agatur, eoque arteriae dilatentur, ac uenae partem quandam

dam sanguinis in patentes tunc auriculas immittant, easque impulsu hoc repleant ac distendant, et hae deinde ita incitatae auriculae, suarum, ut elateris sui, contractione fibrarum, dum cor iterum relaxatur, et nouam per neruos, atque elastico arteriarum resultu et contractione, expresso et retrocedente nonnihil sanguine, per hiantes tum arterias coronarias, uim motricem recipit, eundem haustum ex uenis sanguinem in relaxatos et patulos uentriculos depellant, eosque distendant, et hoc uiuido ictu incitatum cor, suarum uigore fibrarum, se denuo contrahat, et ita repetitis deinde auricularum et uentriculorum, uti coeperunt, alternis contractionibus, circuitum sanguinis tueatur ac perpetuet, quoad illa partium solidarum et liquidarum cohaesio atque communio perseveret. Motus enim cordis et circuitus sanguinis ita inter se nexi et iugati sunt, ut alter alterius auxilio egeat, ac neuter sine altero esse et consistere possit.

IX.

Quod si haec referamus ad causas, quibus pulsus, siue motus cordis, in nobis incitari, animaduertimus, earum complures quidem,

dem, et fere innumerabiles, saepeque leuissimas esse, et propiores alias ac febris iunctiores, alias antecedentes, et remotas alias, uarieque adiuuantes, cum euidentes, tum abditas, singulares et proprias cuiusuis, uel pluribus communes et uniuersales, interiores, externasque, omnes tamen necessario agere, in eoque conuenire, comperiemus, quod uel recursum sanguinis per uenas, uel liquidi per neruos, uel utriusque motum ad cor accelerando, uel hoc irritando, pulsus eius cieant, et frequentem reddant. Id ut exemplo facili, saepeque obui, demonstrum, ponamus hominem sanum, et aetate ac uiribus florentem, itinere plurium milliarium, aestuosa uia, et pede citiore, ac partim cursu, multo labore et sudore, ocysime confecto, fatigatum, de lassitudine phlegmonosa, ac ueluti confractioe omnium artuum, de dolore capitis, aestuque graui et incendio inprimis interno, cum palpitatione cordis, pulsu uehementi, siue forti, frequenti ac celeri, lingua oreque arido, ac siti ingenti, spiritu anxio, anheloso, et calido, aluo suppressa, urina difficili, pauca, rubra et crassa, inquietudine demum, nocteque infomni, conqueri, alteroque, et sequentibus diebus ad sextum usque, quo

quo è uiuis decessit, haec eadem non modo continuari, sed etiam grauiora reddi, aliaque post alia symptomata, defectiones praesertim uirium, cum pulsu ualde frequenti, debili, ac inaequali, delirio, frigore extremorum, alioque perliquida, spumante et foetida, accedere.

X.

Hunc, quiuis intelligens, feбри, dicet, continua simplici, siue continente, eaque acuta, quam uulgo synochum putrem appellant, ex labore nimio, quem illo itinere pertulerit, laborare. Idem uero, si gnarus sit circuitus sanguinis, sciet etiam, eodem illo labore, et nisu atque contentione musculorum, quorum tot repetitis alternis, uelocibus ac uiolentis contractionibus, iter illud confectum est, reuersionem sanguinis per uenas ad cor, quorsum ei uia, propter ualuulas et sectionem uenarum maximam, recta et directa patet, acceleratam fuisse, eaque impulsione motum cordis sensim incitatum, et celeritate ac robore magis magisque auctum, uti magnam circuitus sanguinis, ita caloris naturalis, mutationem attulisse.

C

XI.

XI.

Neque enim pulsus cordis naturali maior atque celerior esse potest, quin a sanguine, ex eodem in arterias, et his contentum flumen humorum, proiecto, pari vi ac uelocitate, et hoc ad circuitum sollicitetur, et una omnes illarum propagines pulsentur, et pulsent, atque ad cordis motum palpitent. Quo fieri porro debet, ut, quia sanguis, cuius facili et placido motu uitalis continetur calor, iam solito maiori uelocitate, maioriq[ue] vi et copia, ex corde in arterias compellitur, ob incitatum illum et praecipitem, sed difficiliorem et uiolentum per angustias earum extremas transitum, ac inde inualescentem mutuum suarum partium, inter sese, et in uascula illa, nislam et attritum, et ipse incalcescat magis, aestuque tandem ferueat, et eodem ipsius aestu et feruore corpus una totum iactetur et concalescat, hoc quidem magis, quo magis cor atque arteriae a renitentibus intus copiosis humoribus incitantur, ac uehementius in eosdem niti et agere coguntur. Quorsum quidem, patet, ipsas extremas arterias eo plus conferre, quo se fortius stringunt, atque appulsui et impressioni humorum resistunt, et difficiliorem

liorem transitum reddunt. Ita uero accelerata cordis et arteriarum actione, cum omnis aestuosi copia sanguinis pari celeritate per arterias in uenas transmitti nequeat, necesse est, accumulari humores in arteriis maioribus, et eadem motus frequentia et celeritate, qua cordis systole et diastole peragitur, arteriarum diastolen et systolen consequi, et hac pressum flumen humorum, quandam sui partem in patentes tunc, arterias coronarias, immittere, eiusque uigore, illam motus cordis et arteriarum uelocitatem, siue febrem, continuari. Nullam hic liquidi neruorum cordis mentionem facio, cuius quidem influxus ratio ex ipsa motus cordis et sanguinis mutatione non difficulter intelligitur. Neque necesse est, hic repeti omnia, quae ad accelerationem sanguinis uenosi, qua cordis motus pariter incitatur, pertinent, cum satis ea ex accelerato sanguinis motu per arterias, et iis, quae supra dicta sunt, colligi et patere queant. Nam uti in circuitu sanguinis naturali, sic in accelerato quoque, una cordis et uasorum, quae cuncta, suarum ui fibrarum motricium, elastica et oscillantia nata sunt, summa est consensio, et ad propulsandum sanguinem conspiratio.

XII.

Ex his uero, quae in propositum casum adduxi, non modo pulsus et caloris febrilis ratio constat, sed illud praeterea apparet, hoc acriorem reddi calorem debuisse, quo maior humidi aquosi copia, partim initio per sudorem in itinere aestuoso, partim deinde motu illo aestuque sanguinis, expressa et dissipata est. Nam uti eius temperatione humidi, miti et suavi sanguis calore liquoreque, fluxioni ipsius et circulationi commodo, totique corpori utili et salubri, uiget: sic eiusdem priuatione ac defectu humidi, densus idem, et minus liquidus ac meabilis, minusque temperatus, redditur. Quam quidem densitatem sanguinis permultum auxit continuata in minimis arteriis, a pressu earum percussuque, tam crebra et ualida compressio, atque augescens inde aestus, cuius quidem uim in addensando sanguine, sanguis ipse, in febribus inflammatoriis uena secta missus, partim in flocculos coactus, summaque parte densus, et quasi pelliceus, ostendit, tum et sanorum lbonus et incorruptus monstrat, cum, leni et parum superante naturalem calore, cum minimo dispendio, in massam siccam, quae uix
dein-

deinde solui potest, coit. Idem uarius caloris gradus docet, quo ouum, uel tremulum et forbile, uel durum redditur. Qui proinde sanguis merito inflammatorius uocatur, quod continuando uitali circulo minus est idoneus, et grauem ubique ardorem creat, et facile alicubi in extremis arteriis haerere, et subsequenti ex corde sanguini uiam praecludere, huiusque ui et impressione adauctus et incitatus, tumorem illum calidum, rubentem, dolentem ac pulsantem, quem inflammationem uocamus, parere solet. Ab eadem uero commotione cordis et arteriarum concitatore, atque hinc oriente feruentis iactatione sanguinis, pro uario eius gradu, uarie affligi naturam, siue oeconomiam et coagmentationem corporis, et in uaria, grauiaque distrahi symptomata, ac tandem dissolui, in procliui est iudicare. Hinc enim in nostro febricitante incendium illud corporis, hinc dolores capitis et membrorum, hinc spiritum anxium, anhelosum, et calidum, hinc impeditas secretiones et excretiones, oris et linguae ariditatem, sitimque uehementem, hinc inquietudines, uigilias, delirium, et magis magisque immobili reddito sanguine, transituque eius per minima arteriarum uascula cessante, et

oppletis demum eodem pulmonibus, corde autem et hoc, et ui omni motrice, destituto, omnium lapsum uirium, et frigus extremorum, ipsamque mortem frigidam, extitisse, cuius intelligenti facile est perspicere, ut iis, prolixè exponendis, immorari nihil hic opus sit.

XIII.

Eiusdem generis febre, ex causa simili, aliisque, subinde iumenta corripì, experientia testatur, et alios inter *Publ. Vegetius*, uir illustris, in *Arte ueterin. sive Mulomedicina*, lib. I. cap. *XXIX de passione et curis februm*, docet: *Febriculis*, ait, *animalibus quamprimum conuenit subuenire. Nam non amplius, quam triduo caloris uim sustinere posse creduntur. Intra quod si curata non fuerint, moriuntur. Oportet igitur passionis huius signa causasque prædicere, et mox medicinas exponere. Febriculus iumentum deiectum caput e terra alleuare uix poterit, erit oculis apertis, labiis demissis, tristitia turpis, et grauitas totius corporis insequitur, testiculi tumidiores laxius pendent, membra caloribus feruent, uenæ uehementi pulsu saliunt, anhelitus creber et calidus, tussis assidua, incessus nutans, fastidium cibi, bibendi cupiditas, uigiliæ iuges. Causa hu-*

ius passionis ex magno labore et fatigatione est, si negligentia consequatur. Interdum aestu nimio, aut perfricatione uehementi, uel ex cruditatibus ciborum, ac sudoris subita infrigidatione, uel ex feruore hordei nouelli euenire consuevit. Et cap. sequenti speciatim equos, memorat, ultra vires ad cursum coactos, aut ponderibus prægrauatos, sudoreque defectos plerumque similia febricitantibus signa demonstrare, et oculos habere sublachrymantes, et tanquam subfufos sanguine, spiritum quoque crebrius agitare, et de posterioribus pedibus melius se sustentare, primosque quasi subtritos tardius ponere. Plura deinde de febribus dictis internis, et diuersis anni temporibus, atque ab indigestione orientibus, subiungit, et lib. III, cap. IV, etiam bouem febrere, addit, idque ex uenarum inquietudine, et caloris totius corporis, uel oris intelligi. Neque alium fuisse morbum illum epidemium, qui superioribus annis in Latio boues depopulatus est, quam febrem pestiferam, Io. Maria Lancisius, V. cl. diff. histor. de bouilla peste p. II, cap. II, diserte testatur. Neque uero, inquit, quin febris affectos boues ureret, dubitandum erat: namque non modo ueterinarii medici, sed ipse ego in illorum arteriis carotidibus et axillaribus summam semper, ac statim ab initio, celeri-

celeritatem ac frequentiam deprehendi. Haec-
nus Lancisius, ex cuius sententia pronuncian-
dum puto de morbo, quo nuper, in his regionibus,
tanta armentorum strages facta est cum in-
signi multorum detrimento, qui damnum hoc
nondum refecerunt.

XIV.

Ex quibus iudicemus licet, quo iure nobilissi-
mum illud par Medicorum febrem de mor-
borum numero excludere, et *Veiga* intempera-
turam utilem, hominique propriam, cl. uero
Stahlius actum, animae humanae proprium, eum-
que utilem et bonum, atque a uulgo tantum
hominum morbis accenseri, arbitrari potue-
rint. Namque uel ex his etiam solis, quae mo-
do sunt allata, abunde constare potest, febrem
primo et immediate, ex se suaque natura actio-
nes laedere, et nulla animae intentione, instin-
ctuque nullo, cieri, neque homini propriam, sed
eidem cum genere animantium bruto et cum
pecore communem esse. Quod si ex uulgo
Medicorum sunt, qui febrem pro morbo habent,
quis negauerit, ad eundem gregem adiungen-
dum ipsum magnum Hippocratem, quem legi-
mus multis locis, ac praesertim *lib. de flat. VII,*

et

et de uictu in acut. febrem diserte morbum, et vulgarem maxime, omniumque prope morborum comitem, et, si acuta sit, plurimis exitiosam, dictitasse. Et quid aliud sunt libri ipsius epidemiorum, primus inprimis ac tertius, qui ex septem foli pro germanis habentur, quam quadraginta duae febri acuta laborantium historiae? quorum maximam partem periisse, quo fuit candore, ingenue professus est.

XV.

Non ita diu est, cum archaeus, nescio quis, tanquam faber febrium, in scenam prodiret. Neque ulla est ratio, quamobrem animam, conservandi corporis causa, febrem, et sibi ipsi, et corpori molestam, nec raro perniciosam, fabricari fingamus. Sustentari uitam et ualitudinem corporis earum obseruatione rerum, quae aut prodesse soleant, aut obesse, nouimus omnes. At uero in mente, siue anima humana, eiusmodi inesse facultatem, quae intus omnia in corpore circumspiciat, et materiam noxiam, *partibus uitalibus corruptionem intimiorem inferre aptam, imo promptam et paratam*, cognoscat, eiusque expellendae, atque ab eadem tuendi corporis, studio, febrem cieat, et, ut opinatur

natur clarissimus *Stablius*, *circulationem augeat et intendat, cum uariis directionibus tonicis uersus loca affecta, aut uersus colatoria, aut emunctoria, et huius utriusque conueniente, et iusta, et efficaci proportione, ad secretiones et excretiones successiuas operosiores extraordinarias*, nemo facile agnoscet, qui ueritatem huius rei suo experiri sensu, et cum circulo sanguinis, qui nutum animae et directiones illas tonicas haud admittit, conferre uelit. Si qua animae prouidentia est, per quam futura prospicit, antequam eueniant, quis non hic seram nimis et tardam animae, conseruationi corporis intentae, curam et prouidentiam iure accusandam censeat, quod non in tempore, tutoque, nascentem adhuc materiam, in ipso ortu, et ante, quam incrementum capere atque nocere possit, anteuertat et praeueniat, sed natam, et corpori penitus iam insidentem, partibusque illius corruptionem inferre aptam, imo promptam et paratam, animamque adeo quasi prouocantem, aggredi demum, eiusque mali expellendi causa, et conseruandi corporis gratia, tantis motibus, et sibi ipsi negotia facere, et in propria corporis suis uiscera saeuire, hac sua horribili uigilantia curaque malit.

XVI.

Id quidem rem bene attendenti constabit, motum cordis, tam naturalem, quam turbatum et febrilem, ab animae nutu et ditione omnino alienum esse, neque eum ab hac, etiamsi maxime uelit, excitari, neque regi sedarique posse, nec magis animam uim nosse et sedem materiae, ut eius potentiae suam conformet actionem, quam cor, organaque reliqua, quibus, instinctu et directione animae, motus febrilis suscipi absoluique creditur. Quae de influxu animae in corpus hic moneri possent, sciens et uolens praetereo, ne res medicas disceptatione philosophica, ubi nil opus est, implicare uelle uidear. Ignorantia nostra, in re alioqui nobis non plane perspecta, qualis est influxus animae, instar fundamenti, cui firmi quid inaedificemus, esse non potest. Neque attinet de eo hic quicquam dici, cum satis pateat, febrem a causis, nulla intentione, sed ἀπροαγέρως et necessario agentibus, exoriri.

XVII.

Nunquam, bene sapientes monent, et sua cuique ratio dictitat, in usum uocandam esse uim et facultatem, de qua controuersia haberi,

et maior, aliaque ex alia oriri disceptatio possit, ubi adest, parque operi uis et potestas, ita euidentis et manifesta, ut de ea ambigi haud liceat. Ecquis uero inficias iuerit, in homine sano, de quo dictum est, folius culpa immoderati motus corporis, sine ope nutuque animae, excitatam febrem fuisse? Praesertim cum ex eadem causa animantia etiam bruta, quae nihil humanae animae habent, eodem corripiti malo, et alias notum, et paulo ante commemoratum sit. Quod autem hic labor et motus corporis nimius facit, idem causae externae ac euidentes aliae, facere etiam abditae et internae possunt, unde magna quidem uarietas febrium nasci et existere solet.

XIIX.

Et si uero sunt, qui cum Galeno contendunt, causas externas non morbos tam graues facere posse, nisi adsit in corpore ad eos suscipiendos praecedens dispositio, et quaedam eorum semina in latebris corporis delitescant: tamen, qui uim et actionem causarum externarum in corpora nostra considerat, is quidem haud difficulter intelliget, pro earum uarietate, corpora nostra uarie, et subinde tam uehementer affici

affici et commutari posse, ut inde, etiam morbo nondum disposita, sed bene ualentia, in febres grauissimas, morbosque alios, abripiantur. Nam uti causae leuiore febrim leuiorem ephemeram, sic causae grauiore febres grauiore, cuiusmodi est ea, de qua egimus, parere possunt. In quam sententiam, alios inter, experientia doctus, *cl. Schelhammerus, lib. de genuina febres curandi methodo, P. II, f. II*, notat, motibus corporis immoderatis, et uel concitatis in cursum equis, uel alio exercitio uiolento, aestiuis praesertim diebus, calore regnante, instituto, febres continuas in purissimis etiam corporibus exarsisse, non semel a se, et ante dudum ab aliis, obseruatum esse. *Archibaldus autem Pitcairnius, Element. med. lib. II, cap. I*, febres, existimat, omnes continuas simplices, pluribusque periodis liberar, ex causa procatactica, manifeste ac immediate motum auctum producente, semper oriri, nec nisi gradu inter se differre, et pro huius uarietate symptomata producere, quae imperitis toto coelo diuersa uideantur. Ac uideri hic sui immemor *Galenus* potest, cum *de differ. febr. lib. I, cap. III*, ita scribit. *Febris, quae lassitudines sequitur, principium quidem, et ipsa habet multam musculorum, neruorum, copularum,*

*et articulorum motionem; quae sane et prima ca-
lescunt: hinc uero continuatim calor ascendit ad cor,
atque inde homo febricitat. Quae si de motu san-
guinis, illarum agitatione partium, per uenas ad
cor accelerato, eiusque motum ciente, ut par est,
accipiantur, nihil a me dissentiunt. Sed minus
est necessarium tam claram rem assensione alio-
rum comprobare. Praesertim, cum ipsum do-
ctissimum Stahlianum l. c. scripsisse uideam, rusti-
cis etiam abunde notum esse, non solum, quod san-
guis citatiore motu per porosas partes periphe-
riae corporis incalescere possit, sed potius non possit
non incalescere, idque illos e cursu, laboribus cor-
poris, agitatione artuum, perspectissimum habere.
Vti uero transitum sanguinis ex arteriis per
interiectam porosam partium substantiam in ue-
nas, quia cum circulo sanguinis stare nequit, et
autopsiae anatomicae aduersatur, nobilissimo
Viro relinquo: ita libenter assumo, cursu et la-
boribus corporis, sanguinem in citatiorem ab-
ripi motum, et incalescere, eoque febrim, si mo-
tus ad uigorem perducantur, citra animae in-
tentionem, et sine latente in corpore dispositio-
ne morbosa, cuius expugnandae causa, anima
febrem excitet, effici posse.*

XIX.

Quamuis autem haec ita sese habeant, tamen illud etiam admittendum esse, patet, facilius febres, et a leuioribus causis, in corporibus impuris, et latente intus dispositione morbosa, exoriri, atque in ea sanitatis latitudine, et pro uarietate naturarum, ipsiusque ratione consuetudinis, ex causis externis et procatarcticis uariis, quosdam facile, difficulter alios, a statu naturali recedere, et in febres morbosque alios incidere. Quemadmodum identidem experimur, ex eodem commisso communi errore, in motibus corporis et animi, uictu, potuque, et causis externis aliis, unum uel alterum febri, morboque alio corripitur, ceteros uero nihil eorum pati, et alium alio magis grauiusque affligi.

XX.

Nec uero hoc praetermittendum est, quod a clarissimis quoque uiris diligenter notatum esse uideo, non omnia, quae per uesicam, meatus cutis, aluum, locaque alia, in febribus excernuntur, pro causis illarum antegressis et continentibus habenda esse, cum ea non raro illarum potius effecta et symptomata sint, et nata de-
mum

mum febre, ui huius, fiant, quibus proinde ipsa origo febris immerito assignatur. Quod si enim in sano, beneque ualente, a ui quadam, extrinsecus accedente, febris exoriatur acuta, quid apertius esse potest, quam vitales in eo succos, uiuumque sanguinem, motu et excandescencia febrili deprauari et corrumpi, ac uitiosos colligi, excerniue, iisque adeo febrim non excitari, at foueri tamen deinceps, et subinde grauio-rem, nec raro exitiosam, reddi. Nec multo aliter se res habet in febribus, a causis etiam interioribus, non tam mole, quam stimulo, nocentibus, excitatis. Et quis omnem illam humorum corruptorum eluuiem, quae in eiusmodi febribus, per diuersas saepe uias, plurium dierum spatio, nec raro ad extremam usque imbecillitatem, et consumptionem corporis, ipsamque mortem, expellitur et eiicitur, antea, quam febris orta sit, in corpore haesisse, opinari potest? De urina *Io. Alph. Borellus, de motu animal. p. II, cap. XXII, prop. CCXII*, non sine ratione submonuit, eius contenta non semper eiusmodi corruptelae sanguinis, cui, tanquam origini et causae effectrici, febris tribuenda sit, notas afferre, cum fieri possit, ut urina ab ipso motu febrili illam demum mutationem subeat: adeo

adeo ut obiter mirari liceat *Galenum, meth. med. gen. cap. X, et s. l. l. VI epidem.* scribentem, tam certum signum ex urina in febribus acutis fumi posse, ut ipsi soli sit fidendum, cum infidelitas urinarum non in malignis tantum febribus obseruetur, sed etiam interdum, post urinas diu coctas, in continente acuta, sine malignitate, interitus nullo errore consequatur, sicuti, suffragante experientia, a Fernelio praeclare annotatum est. Apposite *Laurentius Bellini, de miss. sangu. p. m. 240*, febres eo praecipue nocere, existimat, quod sanguinem febrili materia uittient, et calorem non naturalem producant, ex quo rursus alia uitia in sanguine, totoque corpore, eueniant.

XXI.

Satis, opinor, ex iis, quae supra de febre acuta exposui, constare potest, qua ratione illo sanguinis in minimis arteriis tritu, aestuque, dissipari et dispergi humidum tenue-albuminis, siue feri sanguinis, crassaque eius portio, una cum globulis huius, compingi et addensari, minusque adeo per uasa minima meabilis fieri, et, nisi restitutione humidi, sanguis subactus et liquidior factus, ad motum circuitumque naturalem

ralem redeat, magis magisque ficcari et spissescere, atque in saniem demum putridam, uti consistentia, colore et acrimonia, sic nomine uariam, eliquescere possit. Inde et illud perspectu facile est, quo modo, eiusdem ui et impetu excandescantiae febrilis, ipsa quoque pinguedo corporis liquari, et sanguini misceri, illudque, succensis uelut lignibus, torreri, per uarios meatus sanies effundi, uariaeque in partibus uariis congestiones et inflammationes excitari, exanthemata item uaria in cute ueluti efflorescere, ipsaeque minima, praesertim cerebri, uascula, uarie labefactari, peruertique ac destrui queant. Vt causam habuerit Hippocrates, cū febrim saepius πυρ appellarit, quod maxima pars febris ignis opera imitetur, urendo, liquando, dissipando, torrendo, et nihil adeo eiusmodi igneo calore propemodum grauius accidere possit, nec quicquam esse ab eo alienius. Eodem aucto arteriarum motu, in febribus humores massae sanguineae eliquari, et corrumpi, quaeque uulgo illius colliquatio, et corruptio, fermentationi, praecipitationi, et acoribus, ac eiusmodi causis aliis, solet tribui, eam saepius solidorum plus nimium incitatis oscillationibus, et potissimum tritui arteriarum aucto, uel potius triturae,

rae, deberi, doctissimus autor *purgandae medicinae a curarum sordib.* pluribus locis, et in primis *cap. VII*, merito suspicatur. Haud aliter ideam febris, et quomodo ea in mortem, morbumque alium, et in sanitatem desinat, accurate, ut solet, describit celeberrimus *Boerhaavius*, hodiernum Academiae Lugduno-Batauae decus illustre, *Aphor. de cognosc. et curand. morb. p. m. 115. et seq.* in quibus merito acquiesco, ne actum agere uelle uidear. Ad-
dam saltem ea, quae speciatim de calore febrili habet *p. 141. Calor auctus*, inquit, *liquidissima dissipat ex nostro cruore, id est, aquam, spiritus, sales, olea subtilissima; reliquam massam siccatur, densatur, concreescere cogit in immeabilem, irresolubilem materiam; sales oleaque expedit, attenuat, acriora reddit, exhalat, mouet; hinc minima uasa atterit, rumpit; fibras siccatur, rigidas, contractasque reddit; hinc subito multos, celeres, periculosos, lethales morbos producit, qui a priori facile deduci possunt.*

XXII.

Haec si *Veiga* perpendisset, procul dubio parcius fuisset in laude et commendatione febris, qua utilem eam dixit intemperatu-

ram, ad salutem totius corporis, uel partium, a motu regentis cor naturae excitatam, atque ex innata doctrina, cum uniuerso caloris exercitu, aggredientis, quicquid noxii in corpore sentiat, et uel coquere, uel pellere, nitentis. Ecquid autem in febre illa, quam in homine sano, ex motu corporis nimio, extitisse dixi, et eius generis alia, itemque in hectica proprie dicta, quam cum febre lenta tabifica, ex latentibus abscessibus et ulceribus, ac corruptelis uiscerum, multoties confundi uideo, uel coquendum, uel pellendum, a quo accersita sit febris, ubi causa nulla antecedens in corpore existit? Suffecisset, si febres ille saltem intermittentes quasdam, et speciatim tertianam exquisitam, quae tutissima est, et septem periodis ut plurimum terminatur, commendatione quadam dignam habuisset, quam quidem, quod corpus expurget, multi minus auersantur, haud secus ac fere popularis est persuasio, grauedinem ea laborantibus salubrem esse. Sed malim ego cum *Solenandro, Consil. med. f. III, cons. VI*, utraque, ut affectibus praeternaturalibus, carere.

XXIII.

Fortasse etiam Cl. *Stablius* aliter sentiet, si
omnia

omnia serio expendere, et rem ex uero, sine amore et odio hypotheseos suae, aestimare uelit. Cum enim circuitus sanguinis iisdem organis, eodemque modo, in homine atque in animantibus brutis, peragatur, et in eundem, ut in se quibus experitur, nullum ius sit animae humanae, quid causae est, quamobrem in motu illo et circuitu sanguinis perturbato, cuiusmodi febris est, *aestimatiua quadam animae energia*, quae ostendi nullo modo potest, hic abuti, et rem expeditam et planam hypothesei, altius repetita, impedire uelimus. Eadem organa et instrumenta, nimirum cor, eique continuata uasa, et inprimis arteriae, quorum motu placido et naturali uiuidus sanguinis circuitus continetur, et uitali ac salutari calore humoreque corpus uniuersum perfunditur, et sui quibusque partibus succi tribuuntur, nutritioni, et peragendis sensuum ac motionum operationibus utiles ac necessarii, quodque superfluum est et inutile, ex corpore mittitur, eoque uita et sanitas, sine directione animae, uiget; eadem inquam organa, in motum adacta uelociorem, inuita anima, totam corporis oeconomiam perturbant, febremque efficiunt et constituunt. Omnis hic sapientia

E 3 pro-

prouidentiaque naturae, quam, ualetudine integra, tam multa praeclare agere, uidemus, quamque, afflicta sanitate, et labefactata, morborum medicatricem nuncupamus, cuiusque ministerio et diligenti motuum omnium obseruatione gloriamur, in eo quaerenda est, quod Deus corpus humanum ex partibus solidis et liquidis, se mutuo agitantibus, eo artificio construxerit, ut nobis sanis obeundis functionibus sit commodissimum, a causis uero morborum concitum, et ad confusionem, inuersumque actionum ordinem, redactum, eadem artificiosa constructione, inprimisque circuitus sanguinis ope, nonnunquam sua sponte, nunc occulte et tecte, modo expurgatione manifesta, per tot uarios meatus, tendere ad sanitatem possit, nec semper succumbere cogatur. Qua ratione ab *Hippocrate*, multis locis, natura ipsa, nihil eorum, quae agit, intelligens, optime suis fungi muneribus, et nulla unquam doctrina erudita et exulta, sine doctore, callidissime, et ita agere dicitur, ut ei maxime conuenit. Eodemque pertinet, quando idem medicinae princeps, *lib. de lege*, ex eoque *Celsus l. 6. lib. III, cap. I*, repugnante natura, nihil medicinam proficere, et uana esse omnia, dixit, Quamquam uero, quae natura duce fiunt, quam

quam optime fieri dicuntur, tamen nulla *προ-
αίρεσις*, nulloque consilio, sed illius potissimum,
quem dixi, motus ministerio, automaticè, nec
raro ita fiunt, ut id, quod a natura expectatur,
auxilium, nunc lentum sit, modo dubium: cum
contra illud, cuius copiam medicina facit, reme-
dium, a prudenti iudicio, arbitrioque nostro
pendeat, et iusto tempore ac modo adhiberi
queat. Quod modo de natura dictum est, eo-
dem referri, uel autoribus suis relinqui debet,
quicquid *Veiga* de innata naturae, cor regentis,
doctrina, et *Sydenhamius*, alique, de conatu na-
turae, materiae morbificae exterminationem in
aegri salutem molientis, praedicant.

XXIV.

Sufficere haec poterant ad demonstrandum, in
quo natura febris consistat, et quod merito
suspecta sit habenda laus, quae a multis ei tri-
buitur. Videamus tamen adhuc, quid de ter-
tiana intermittente ab iisdem statuatur, quoni-
am uideo eam celeberrimo *Stahlio* febris geni-
um uniuersum manifestare, et tam exquisitum esse
specimen totius apparatus motuum febrilium, ut
ii in eadem etiam in crassum magis sensum incur-
rant. Id quod quidem exemplo iuuenis sani,
qui

qui ex anguillae elixae multa et repentina ad nauseosam usque satietatem ingurgitatione, altero die febris illa correptus sit, satis prolixè et laboriosè demonstrare conatur. Sed hoc breuius, paucis saltem additis, rem complectar, quo ille maiori cura operaque usus est, quia intelligentibus uel sola simplex narratio satis esse potest. Quis enim opinetur, animam ideo, et hac bona intentione, ut, quod heri anguillae elixae deuoratum, atque in mucum lentum conuersum est, hodie, et diebus alternis sequentibus, uomitione reddatur, febrim tertianam mouere, cuius paroxysmus secundum cl. Virum l. c. cap. V, nihil aliud sit, quam apparatus motuum humorum et totius massae sanguineae localium, pro materia in uentriculo et primis uis haerente, nihil aut male concocta, inprimis autem tenaci uiscosae lentescientiae uel proxima, uel idonea, ad promptam excretionem, per uomitum, aut aluum exturbanda, deinde uero massa humorum inprimis debitae suae tenuitati restituenda, et ex aliqua quoque parte resoluenda, adeoque imminuenda.

XXV

Ita uero descriptus paroxysmus duplici motu, contractionis altero, altero relaxationis, absolui

solui dicitur. Vt enim anima praeparationem excretionemque illius materiae recte perficiat, Vir cl. opinatur, nutu illius habitum corporis constringi, eoque humores et uniuersam massam sanguineam in interioribus coaceruari, atque ex hac tam stricta humorum coacervatione, ac diuturna detentione circa interiora, et secessiones fieri subtiliorum fluorum, iisque, cum cauitates quasdam alias, tum uero uentriculum et oesophagum perfundi, ut diluant, emolliant, ac demoliantur materiam uiscosam, et eidem quoque uehiculo sint, impedianque, quo minus illa, alicubi tenacitate sua denuo obhaerescendo, totum uomitionis actum frustrari, sed hic eorum ministerio fluorum, commodissime fieri possit. Ea etiam ratione saluam putat affundi, non ut ex ore effluat, aut exspuatur, sed ut deglutiatur, ac mouendae excretioni uomitoriae pariter subseruiat. Vti uero illa constrictio habitus corporis ipsius animae opus et actiua sit, quam necessario illa syndrome circumstantiarum, pallo-
ris, frigoris, uasorum exinanitionis ac disparitionis, sensusque spasticarum constrictionum, ac demum *succussionis* sequi debeat: sic frustra et sine ratione adduci, censet Vir cl. quae a recentioribus de passiuis spasmis, cutis aequae, ac
F totius

totius ambitus corporis, dicantur aliter, aliter scribantur.

XXVI.

Atque sic quidem, ut is opinatur, anima, cum frigore unius et plurium horarum, ac demum etiam succussu, corpus constringit, et sanguinem in interiora cogit, atque coactum ita et coaceruatum detinet, ut ex eodem emulgeantur et secedant liquores, haerenti inprimis viis diluendae, euendaeque materiae tenaci et visco-sae conuenientes; quamvis id irritum plerumque conatu, et sine fructu, aliquando etiam cum ipso uitae discrimine, fieri, usus testetur. Satis enim experientia constat, et ante ex *Harueio* annotatum est, eos, qui febre huiusmodi moriantur, eodem hoc accessionis tempore obire, eo autem superato, uitam seruari. Ac uideas non raro his in febribus, quod speciatim in epidemiis animaduertit celeberrimus *Meibomius*, *diff. de feb. interm. epidem.* et cardialgias et uomitus frequentes admodum, ac saepe immanes, misereque aegros excruciantes, ac reiectis ex uentriculo bile et uariis humoribus aliis, cum nihilominus admanes uomitiones extimulari. Illud quoque in uulgus notum est, has saepe febres magis frigore, quam calore, molestas esse, ita ut multi se

dun-

duntaxat febricitare putent, quamdiu frigus urget, febre se liberatos censeant, quamprimum calor sequitur, ob quam etiam causam in pluribus locis hae febres a frigore nomen ceperunt. Cui addendum, quod non raro, durante urgenteque frigore, permolesta sit oris siccitas, sitisque uehementer affligat. Quo quidem modo anima iure existimari potest, potius carnificinam, quam medicinam, adhibere, quod a minori malo affecto saltem uentriculo, ilico, nullo errore, sed ex instituto, maius damnum uniuerso corpori creet, et, cum, unico adhibito uomitorio, ab omni isto peruerso labore ac periculo secura esse possit, repetitis toties paroxysmis frustra tempus conterat. Si ioco hic locus est, ipsa sibi anima, ob illum in diaeta permissum errorem, succensere uidetur, et libidine puniendi corporis, quod deuoratum cibum non satis confecerit, illud immissa febre ulcisci.

XXVII.

Sed quid statuendum de uomitibus, qui intertiana sine frigore, adeoque sine apparatu motuum illorum constringentium, et humores in interioribus coaceruantium, fiunt? Neque enim hoc perpetuum esse, intermittentem cum

frigore incipere, satis experientia euincit. Ita, praeter ceteros, *Villifius*, lib. de feb. cap. III, annotatum reliquit: *increbuit*, inquit, *hoc autumno febris intermittens*, cuius accessiones tantum cum calore, eoque intensissimo, aegros exercuere, in plerisque adfuit uomitus immanis, minime uero frigus, aut sudor, post quatuor dein, aut quinque periodos, ingruente paroxysmo, parum algere, et postea aperte rigescere solebant aegri. Sic etiam *cl. Meibomius* l. c. in aliis quoque epidemicis constitutionibus sibi animaduersum esse, tradit, ineunte quidem febre leuem horrorem plerosque inuasisse, quosdam uero omni horrore uacasse, deinde non paucos paroxysmos cum uehementi calore, uomitu, aliisque symptomatibus accessisse, nec de ullo frigoris uel horroris sensu conquestos fuisse, quosdam tamen, in ipso calore constitutos, se simul et frigore et calore affici, dixisse, et manibus, extra lectum proiectis, se frigus sentire. Ex quibus et illud apparet, non semper uomitiones, etiam copiosas, tale hic leuamentum afferre, quale uisum fuit doctissimo *Stablio* l. c. cap. II. Quo loco, uelim, non reperiri ex *Spicilegio anat.* *Kerckringii* adductam a *Cl. Viro*, quam notabilem uocat, historiam iuuenis rusticani, qui, ut uerbis eius utar, cum

tertiana febre per multas septimanas conflictatus, tandem per alvum deiectis acinis aliquot seu baccis uuarum, adhuc integris et nihil alteratis, quos ante inuasionem febris, cum pluribus, sed melius commasticatis ingurgitauerat, a febre facile deinceps et cito liberatus est. Is enim iuuenis nulla tertiana laborauit, sed exactis demum tribus mensibus, quibus nihil incommodi sensit, in tam frequentes et graues incidit lipothymias, ut saepius uideretur redditurus animam, non nisi leui interim uexatus, sed perpetua febricula. Atque is quidem triginta circiter uuas integras, non mansas, aut fractas, deuorauit, quarum decem, quae ultra tres menses in uentriculo haerant, integras, succoque plenas, adhibito remedio, reddidit, et, hoc leuatus onere, conuuluit. Id uero obiter saltem hic monere uolui, occasione uomitionum, quae, quoniam etiam in febribus quibusdam intermittentibus, nullo frigore, adeoque sine illa constrictione habitus corporis, et hanc consequente coaceruatione humorum ad interiora, sed solo calore inuadentibus, euenire obseruantur, id quidem dilucide monstrant, ad excitandas uomitiones isto tanto apparatu motuum humorum et totius massae sanguineae, quam anima moliri et efficere creditur,

tur, haud opus esse. Sed mittamus haec, et paucis uideamus, quid anima posthaec operetur et agat.

XXVIII.

Ista igitur, priori perfuncta labore periculoue, iam in eo tota est, ut constricto antea corpori, eoque ad interiora coacto et spissescenti sanguini, laxamentum detur et spatium, pulsuque, qui *sub frigore tardus et rarus erat*, celeri et frequenti reddito, transitus per porosas partes peripheriae corporis, augeatur, et hoc motus augmento, sanguis a spissitudine ad debitam tenuitatem reducatur, et, parte quadam feri emissâ, imminuatur.

XXIX.

Pullum sub frigore tardum et rarum supra tetigi. Attigi quoque transitum sanguinis ex arteriis per porosam partium substantiam in uenas, et ductus alios, eumque circulo sanguinis aduersum esse, dixi. Ceterum ab accelerato motu sanguinem, pro uaria sui illiusque conditione, et tenuem ac fluidum, et densum minusque meabilem, reddi posse, et augmentum secretionis humorum determinatam requirere uelocitatem, atque ab adaucto nimis circuitu sanguinis totam secretionem animalem impediri peruertereque,

que, notius iam est, quam ut hic describi debeat. Quid uero opus est, ut fingamus animam, postquam constrictione corporis, immissoque frigore, corpus concussit et excruciauit, ad alterum tormenti genus, nempe aestus et ardores, sese conferre? Praesertim cum sine ea febris huiusmodi, ex errore diaetae existentis, ratio, ex chyllo crudo, siue lentore, haerente in primis uis, indeque per uias lacteas ad sanguinem traducto, tam facile deducatur, ut hinc, quaecunque in illa febre eueniunt, quaeque in curatione sint ineundae uiae, rerum confirmatae usu, elici colligique possint.

XXX.

Sed diutius me detinuit huius rei expositio, quam uolui. Quid enim a febribus etiam intermittentibus expectandum sit boni maliue, absoluisse uidetur, honorifice semper appellandus *Boerhaavius l.c.* Mihi iam satis sit, quantum sinebat festinatio, subuertisse illam febris laudem, meritoque suspectam demonstrasse. Id denique perspicui in promptu esse, puto, *Veigam*, efficta sibi quadam, cor regente, natura, aras ignoto deo erexisse, et iure indignatam esse felicitatem apud *Augustinum de Ciu. Dei lib. IV, cap. XXIII*, quod secum coleretur *Priapus, et Cloasina, et Pavor, et Pallor, et Febris, et caetera non numina colendorum, sed crimina colentium.*

NOBILISSIMO
ET CLARISSIMO
CANDIDATO

S. P. D.
PRAESES

Si sua illis merito impertienda laus est, qui
literarum studiis florentes, omnibusque
probat, se ingenuos atque integros ser-
uant: qua tu laude efferendus eris, in quo et
doctrinae humanitas, et medicae artis peritia
de gloria contendunt, quarum tu rerum fi-
dem, applaudente Medicorum Ordine fecisti
luculentam. At quo est excellentius, suffra-
gantibus solis, quibus eminet optimus quis-
que, meritis, honores capeßere, eo magis
iure quodam tuo decreta tibi Doctoris orna-
menta postulare uidebaris. Ego uero mirifice
afficior, tuaeque, cuius tu et spei et famae de-
beris, patriae, tibi autem ipsi collatam merito
dignitatem gratulor, utque amplissima, com-
muni omnium consensu, honorum semper au-
gearis accessione, opto.

